



INKESTA

ZER DAGO JOKOAN MAIATZAREN 13AN?

ZEIN IZAN BEHARKO LITZATEKE JAURLARITZA BERRIAREN LEHENTASUNA?

IÑAKI ARREGI (UEMAko bateragilea)

«Euskal Herriari European leku bat egitea da abertzaleen obligazioa, Lizarrako bidetik»



Euskal Herriaren edo zati baten eraikuntzak eguneroko jarduna eskatzen du. Maiatzaren 13a egun berezia izan arren, beste egun bat baino ez da. Berezia, bi urte nahasi hauetan alderdi bakoitzak eginiko lanaren emaitza jasoko duelako. Bozak, Estatu-tua gainditzeko hasteko ala dagoen moduan uzteko *plebizitu* legez har daitezke. Jaurlaritzaren lehentasuna eta abertzaleen obligazioa Euskal Herriari European leku bat egitea da. Horretarako, Lizarra-Garaziko bidera bueltatu behar dugu: abertzaleak elkar lanean eta *piano-piano*, elkarriketa eta foru pasea erabiliz arma modura.

XABIER GEREÑO (Idazlea)

«Pertsona guztien berdintasuna aldarrikatu eta babestu behar luke Jaurlaritza berriak»



Etorkizuna. Funtsean, dilema bat dago: nor edo zer dira nagusi, pertsonak ala gauzak? Gauzak, elementu materialak eta guk sortutako ideiak dira, bizigabeak, eta ez dute sentitzeko ahalmenik. Gu, pertsonok, izaki bizidunak gara, sentitzeko gai. Zer jarri behar da zeren zerbitzuan? Jaurlaritza berriak pertsona guztien berdintasuna aldarrikatu eta babestu behar luke, guztien eskubideak defendatu, gogoan izanik pertsona bakoitzaren eskubideak ez direla mugagabeak. Giza eskubideak defendatu behar ditu gauza guztien gainetik, ezin daitekeelako gizarte zoriontsurik sortu injustizian oinarrituta.

SAGRARIO ALEMAN (Arturo Campion Euskaltegia)

«Euskalgintzaren inguruan egin ditugun aurrerapen gutxi horiek jokoan daude»



Batez ere euskararen eta euskalgintzaren inguruan orain arte egin ditugun aurrerapen gutxi horiek jokoan daude. Arrisku latza dago atzera egiteko, baldin eta Mayor Oreja lehendakari aterako balitz. Ikusi dugu Nafarroan nola jokatzeko duten PPkoek. Beraz, beldurra izatekoa da hauek lortuz gero lehendakari-tza. Ez bakarrik EAEn bizi direnentzako, baizik eta Nafarroan eta Iparraldean bizi garenontzat ere, euskara arloan izanen du eragina. Aurrera begira indar abertzaleek, progresistek, eta aurrerakoiek elkarrekiko bide batean jokatu beharko lukete.



MIKEL SAIZ

Eako Iruñeko egoitzan ez da antzematen gehiegi maiatzaren 13ko zurrunbiloa.



MIKEL SAIZ

EHko egoitzan badute hauteskunde berri, baina ez dute kartel bat ere jarri.

Nafarroako alderdiek «interes handia» dute

ZAIN. UPN eta PSN «aldaketaren zain» daude. CDN, EA-EAJ eta IUk ez dute jauzi «nabaria» nahi. EHk Iruñean hasi du kanpaina

Irene Arrizurieta | IRUÑEA

EAko hauteskundeek «interes handia» sortu dute Nafarroako alderdiengan. Bertako alderdietako buruak, iritzia emateaz gain, gogoz lan egiten hasi ziren kanpaina-aurrean, eta beharrean jarraitzen dute kanpaina. EHk kanpainako lehen mitina Iruñean eman zuen, eta Begoña Errazti EA-EAJko Nafarroako legebiltzarkide eta Eako lehendakaria ohikoa da koalizioaren ekitaldi politikoetan.

Alberto Catalan UPNko idazkari nagusiak, Araba, Bizkaia edo Gipuzkoara PPko kideak laguntzera joateko asmorik ez dutela esan du, baina Juan Cruz

Alli CDNko presidenteak esan duen legez, PPren «bir konkista ahaleginean» oinarritzen ari da kanpaina. «Euskal Herria bir konkistatu nahi du Espainiarentzat», ohartarazi du. Horren lekuko dira, besteak beste: Aznar Espainiako presidentearen eta haren ministroen joan-etorriak Bilbora; beste erkidegoetako presidenteenak (Sanzen bisita Donostiara); kontseilariena (Francisco Iribarren Nafarroako Ekonomia arduraduna Gasteizen); alkateena (Barcinaren esanak Castellon).

UPN Nafarroa «defendatzen»

Yolanda Barcina Iruñeko alkateak Castellon esana du nafarrek bizitza tentsio handiagoz

bizi dutela, Nafarroa «nazionalisten lehen helburua» delako, eta «beti bereganatu nahi izan» dutelako. EA-EAJk zera erantzun dio: «Informatu zaitetz hobekiago Euskal Herriko errealtate historikoa beste erkidego batean publikoki erabili aurretik». Hitzok Euskal Herriaren jatorriaz eta hura lekutzen den lurraldeez alkatearen «ezjakintasuna» adierazten dute, EAren arabera.

Barcinaren atrebentzia Catalanek baretu nahi izan du. Euskal herritarrek aukeratu behar dutela dio. Dena dela, «aldaketaren nahia —PPk EAEko lehendakari-tza lortzea— errealtate bilakatzea» nahi luke. «Gizarteak ezin du jasaten jarraitu

EAEko Gobernuak egin duen politika baztertzaila», gaineratu du.

Dena dela, hobekuntza «nabaririk» ez izatea espero dute Allik berak, Felix Taberna IUN-NEBko koordinatzaileak zein Begoña Errazti Eako lehendakariak.

Laguntzera

Erregionalistek ez bezala, sozialistek eta IUN-NEBkoek erreparorik gabe esan dute EA-Era hurbilduko direla alderdiki-deak laguntzera. Kanpaina-aurrean egon dira, eta kanpainako mitin nagusietara joan dira. IU-EBk jendea ere bidali izan du lan egitera eta laguntzera. Bi aldedion ordezkari-tzak emaitzaren zain egotera ere joan dira maiatzaren 13ko gauean EAera.

Hala, Juan Jose Lizarbe PSNko idazkari nagusiak aldaketa nahi duen bezala, Tabernak PPko hautagaiari «benetako ordagoa» sartu nahi dio. Ildo honetan, maiatzaren 14an EAEn «elkarriketa politikoa» behar dela dio PSNko buruak. IU-EBkoak, «solasa bai, baina Jaurlaritza askotarikoarekin», esan du.

PROPAGANDA

Kartelik ez EA eta EHko egoitzetan

EAK Iruñeko Gaztelu Plazan eta EHk Nafarroako hiriburu Alde Zaharrean dituzten egoitzetan, Araba, Gipuzkoa eta Bizkaian hauteskundeak dituztela ez da gehiegi igartzen. Ez begi-bistara hain deigarriak diren propaganda afixetan, bederen. Ez dago M-13ko kartelik, ez presarik, ez hautagaien hitzaldia prestatzeko premiari, ez azpiegiturarako material nabaririk.

Errazti EAKo lehendakaria EAJ-EAKo mitinetan ikustea eta entzutea ohikoa da. «PP sufritzea zer den» Nafarroan ikasi duela dio, eta horregatik ondokoentzat «Nafarroan duena» ez duela nahi azpimarratu du.

EHk hauteskunde kanpainako lehen mitina Iruñean eman zuen, eta, haien kideen mezuetan, nabaria da EAEko hauteskundearen interesa.